

Un logro hopi grandi pa Aruba Joyce Pereira a yega Aruba despues di haya su doctorado den Papiamento na Universidad di Corsow



ORANJESTAD (AAN): Dialuna anochi a yega Aruba dr. Joyce Pereira, kende a bin di Corsow despues di a defende su thesis pa haya su doctorado den Papiamento for di University of Curacao. El a wordo ricibi na aeropuerto door di algun mandatario, parlamentario, famia, conocirnan y miembronan di Fundacion Lanta Papiamento. Prome Minister Evelyn Wever-Croes, Minister Lampe, Minister Ruiz Maduro tabata tey presente y a expresa palabranan di felicitacion pa e logro grandi y cu ta yena comunidad di Aruba cu hopi orguyo.

"Nos cu conoce Juffrouw Pereira, tabata sa di semper cu e no ta un hende cu ta laga nada strob'e. Pues, ora cu mi a compronde cu e logro aki ta na caminda, mi tabata sigur cu ta algo asina e ta bay trece pa nos", Minister Presidente a expresa. Esaki ta e aña cu Gobierno a declara como aña di Papiamento y esaki ta un logro asina grandi y ta pass den otro.

Como hende muher, a agrega, e ta sinti hopi orguyoso cu un otro hende muher a yega asina leu y e ta spera cu esaki por ta un inspiracion pa tur hende muher, pa tur

hoben y henter comunidad. Dr. Joyce Pereira a manifesta cu ta esaki a cuminsa como un proyecto cu e kier a haci y bay te den profundidad di diferente aspecto di idioma Papiamento. El a bisa cu el a hacie cu pasion y amor cu e tin pa Papiamento.

Awendia pa kere den algo ta rekeri estudionan científico, a bisa. Mester datonan, mester hopi informacion basa riba investigacion científico, a remarca.

Esey el a trata di haci cu e trabao aki y despues di hopi trabao, hopi determinacion el a keda cla cune. Sin cu e por a spera el a haya un acogida masha grandi, a expresa. "Tabata un momento fantastico ora ami cu mi dos ruman, cu tabata mi paraninfonyan a drenta sala y mira un banda di e sala completamente di Aruba. Tur mi famia tabata tey, mi primo, mi primanan, tanta, amigonan di Aruba. Tabata fantastico", Pereira a bisa.

Joyce Pereira a gradici pa tur e sosten cu el a haya tur e añanan aki, specialmente di su coleganan di Fundacion Lanta Papiamento. Tambe e personañan cu a sigui e evento riba "live stream". Banda di esey el a gradici famia y amigonan pa e sosten brinda.

